

**Me
Korinita
Yai Leta
Vi'-inuana
Paulo Wayahina**

Buki Taina Wayahina

Buki taina a tau ginuma vivane Paulo. Ka leta taina omo tau ekalesia imamaei meagai Korinita nihenina.

Paulo me Korinita yai leta naona ginumi va-tawanei, ka eha ya nuanua na-potapota bana mamanaina aitam nau-pata taui wayahia na-vaniahe. Wayahina, tauna ya tau ivaita ana wava Titusi vi-tunei omo meagai Korinita wayahina na-nau-vi-taui. Iakwa, e Titusi meagai Korinita ni-tawanei mavi-havine Paulo wayahina, e me Korinita vaneai mataedei. Ka avaha Paulo vaneai nononi, tauna yai leta taina ginumi va-tawanei omo wayahia. Ka leta taina nihenina tauna ya dewa-haiawa taui wayahi, kadu ya nua-vita wayahi totohi. Ka tauna me Korinita yapoyapoi, kadu tauna a havia etutuia venauei.

Tauna ya nuanua am-venena-kavovo ananina ivo-vi-aiaia tau payapayaya imamaei papani Iudea nihenina wayahi. Kadu tauna ana inahe ya paisewa wayahina voneyei.

Nau-kaiwa

¹ Kaiwa ananina itomi me Korinita wayahimia. Itomi Yaubada ya tau ekalesia. Ka leta taina omomo wayahimia ka kadu omomo Yaubada a tau vitumahana habuhabui papani Akaia nihenina. Vaneika Timoti ivaiteu aginuma, ka yauke Paulo. Yaubada vi-nua-dadaneu avi-tau hae ananina Tau Ito-yavuha Iesu wayahina.

² Ka yama viama wayahimi vivane am-venena awawaehina kadu nua gomagomanina uvaniahei Amaka Yaubada wayahina kadu yaka Kauvea Iesu Tau Ito-yavuha wayahina.

³ Yaubada yaka Kauvea Iesu Tau Ito-yavuha ya Yaubada kadu tauna Amana. Ka ate-nuanuai omomo Amaka wayahina kavaniahei, ka kadu tuta tuta Yaubada yana dewa wayahika dewa bigana. Wayahina, nau-wawanika tauna kan'-awa-davedavei.[◊] ⁴ Iuna tauna yana dewa yama vita habuhabui nihenina dewa bigana, e ya nuanua munia itoai ama pata dewa bigana wayahina mani tomotau ana-ivaitei deina. ⁵ Vona ahiahina, Tau Ito-yavuha ana inahe habuhabui, ka inahe-naia tupwai iaubo-tamani, e yawaiai nihenina avaniahei, iuna tauna ya paisewa apaipaisewei. Ka kadu Tau Ito-yavuha wayahina dewa bigana omomo avaniahei aitamoata deina, e dewa biga-nana am-iwaiwahi, ka vitaia vane-tawanei.[◊] ⁶ Wayahina, aituhu avi tuta vitana avaniahei yama paisewa wayahina, akanai, avaha anamanei, munia itomi dewa bigana kadu ito-yavuha uvaniahei paisewana wayahina deina. O aituhu dewa bigana

[◊] **1:3:** Rom 15:5. [◊] **1:5:** Sam 34:19.

avaniahei vitai niwania, munia ama pata dewa biga-nana wayahina ana-ivaitemi. Ka aituhu vitai uvaniahei deina, itomi ami pata vitai niwania utoha-vi-anaimi. ⁷ Ka yama nua-vaniaha nui apotapota wayahimi, umimini-toyoina. Ka eha anua-vita wayahimi, iuna ayaha anamanei aituhu vitai uvaniahei itoai deina, akanai, kadu dewa bigana uvaniahei aitamoata itoai deina.

⁸ Vavaneiai, itoai yama nuanua vitai avaniahei papani Asia nihenina unl'-anamanei. Vitai vivane vita-vainena, ka itoai ama heta eha ama pata atoha-vi-anai, ka eha ama pata vitai anau-yehai. Wayahina, anuanua vivane tuta eha ani-hoina na-iakwa wayahina yawai na-iakwa.[☆] ⁹ Ika, anuanua Yaubada avaha ama havia awaehei ina-nau-vi-anigiai. Kate Yaubada ya nuanua tunina. Tauna vitai awae-heai iuna ya nuanua na-viwaveneai itoai yama bagibagi eha ana pata vitai wayahi. Ya nuanua anua-hau vivane tauna ya bagibagi ana pata vitai wayahi, iuna tauna ya bagibagi ana pata tau aninigai na-si-vi-mini-havinei. ¹⁰ Ka eha ani-hoina anl'-aniga vitai wayahi, kate Yaubada yavuhiae yama paisewa ana-nau-yehai. Ka anamanei tuta tepakaia wayahina tauna na-yavuhiae deina. Ka yama nua-vaniaha nui apotapota tauna wayahina, e tuta tuta ya nuanua na-yavuhiae.[☆] ¹¹ Ka itomi ami pata una-ivaitesi yami viama wayahina. Ka munia, tomotau habuhabui Yaubada ina-nau-kaiwei iuna itoai ivaita awawaehina avaniahei tauna wayahina,

[☆] **1:8:** Dew 19:23; 1Ko 15:32. [☆] **1:10:** 2Ti 4:18.

ka ivaitana nau-patai itomi habuhabumi yami viama wayahina.

¹² Wayahina, am' ayaunena apa-vidovidohawai, ka yama vonana vona tunuhina. Yama dewa habuhabui ahihiata kadu tunutunuhi tau ma' tanopi mataia kadu itomi matamia. Ka yama dewai ivin'-omo Yaubada yan' am-venena awawaehina wayahina, ka eha tau ma' tanopi yai nua-uya wayahina. ¹³ Ka yami leta habuhabui nihenia, eha aitam aviani vitana wayahimi ata-ginuma, kate ami pata una-iavi, kadu ami pata nua-uya habuhabuna nihenia unua-hau. Ka kadu yau nua-vaniahia nui apotapota. ¹⁴ Nonova yama dewa tupwai unua-hau, ka yau nuanua tuta tepakaia wayahina un'-anamaneai yama dewa habuhabui ahihiata. Wayahina, tuta tepakaia wayahina itomi ami pata un'-apa-vidovidohawai. Ka apaina, Kauvea Iesu yan' auyewa wayahina, itoai an'-apa-vidovidohemi aitamoata deina. [☆]

Paulo Ya Vi-nua-hauhau Naona Vo-vinei

¹⁵ Yauke avaha avitumahanemi apaina udedewe deina. Wayahina, yau vi-nua-hauhau naona taina deina. Yau nuanua yau nae nihenina, naona anau-vi-taumi, e ana-ivaitemi tuta ainua wayahina deina. ¹⁶ Ika, yau nuanua an'-omo papani Masedonia wayahina, ka yau nae-nana avi-putu itomi yami meagai Korinita wayahina, e anau-vi-taumi. Na-iakwa, e me Masedonia anau-vi-taui. E amavi-havine wayahimia, e anau-vi-taumi tuta v'-inuana wayahina. Na-iakwa, itomi ami pata

[☆] **1:14:** 2Ko 5:12; Pili 2:16.

una-ivaiteu yau omana papani Iudea wayahina.[☆]
17 Nonova, tutana yau vi-nua-hauhauna naona avi-nua-dadani, kaiwadi, itomi unuanua adewa-kavokavovo, a? Avonemi, eha. O kaiwadi, unuanua tau ma' tanopi yai dewa-kavokavovo avi-nua-dadani deina, a? Avona-havinemi, eha. Iuna tau ma' tanopi yai dewa deina. Ivonavona, "Ika, ika adedewe deina," kate taui nihenia avaha inuanua, "Eha, eha adedewe."¹⁸ Kate yama mataeda wayahimia eha deina. Eha tuta aitamoata wayahina "Ika" kadu "Eha". Yaubada yana vona ka yana dewa aitamoata, kadu itoai yama vona ka yama dewa aitamoata deina.¹⁹ Yaubada Natu-hoina vivane Iesu Tau Ito-yavuha. Ka yauke, ka Silasi, ka Timoti ama itonu tauna anau-waheyei wayahimia, ka tauna eha "Ika" kadu "Eha" tuta aitamoata wayahina. Tuta tuta wayahina Iesu nihenina Yaubada ya vona-dabadaba vivane "Ika", iuna Iesu Yaubada ya vona-dabadaba habuhabui ai pai nau-yehata.[☆] **20** Yaubada ya vona-dabadaba habuhabui imamaei, ka Iesu avaha aitamoata aitamoata wayahia nau-yehai tunutunuhina. Wayahina, itoka tau vitumahana avaha Iesu yana dewa habuhabui kanamanei. E tauna wayahina kawaehi aitamoata, kadu kavonavona, "Ika, ana pata deina". Ka yaka awaeha wayahina Yaubada didigana kavo-vi-natei.[☆] **21** Yaubada vo-vi-bagibagimi kadu vo-vi-bagibagai kamimini toyoina Tau Ito-yavuha nihenina. Tauna vi-nua-dadaneka,²² kadu tauna ya pai ainana boui wayahikaia, e habuhabuka

[☆] **1:16:** 1Ko 16:5-6. [☆] **1:19:** Dew 18:5. [☆] **1:20:** SiV 3:14.

kan'-anamanei itoka tauna ya tomotau. Ka kadu tauna Nuana Ahihinata nuaka nihenina boui, e kan'-anamanei ya vona-dabadaba habuhabui tuta tepakaia wayahina eha vitupu. Kate vona ahiahina, kavaniahei.²³ **23** Eha avitupu wayahimia. Aituhu Yaubada vi-tau hae yau vonana wayahimia wayahina, akanai adewa-haiawa. Iuna avonevonemi, eha yau nuanua adewa-yaiyaiemi yami dewa goyona wayahina. Wayahina, yau vi-nua-hauhau naona avo-vinei, ka eha amavi-havine meagai Korinita wayahina. Aituhu amavi-havine, kaiwadi yami goyona adudueye, e munia nau-wawanimi dewa-yaiyai uvaniahe dewaia wayahi. **24** Itoai eha yami vitumahana a kauvea, kate vona ahiahina, nui kapaipaisewa yami vitumahana nihenina umimini toyoina, e apaina yami dewa-haiawa uvaniahei deina.²⁴

2

1 Wayahina, avi-nua-dadani eha amavi-havine wayahimia, kate ana heta yami leta aitam aginumi ava-tawanei omo wayahimia.^a Iuna aituhu avaha aomo wayahimia, ka aituhu avaha yami goyona avaniahe, kaiwadi nau-wawaniu ayapoyapomi, e itomi ini-yauyau

²³ **1:22:** Epe 1:13-14; 2Ko 5:5. ²⁴ **1:24:** 1Pi 5:3. ^a **2:1:** Paulo leta aitonu ginumi va-tawanei iomo me Korinita wayahia. Tuta nonova wayahina leta naona maiova, ka nonova a itoava tuta ataina wayahina eha wayahikaia. Wayahina, tuta nonova wayahina tomotau leta v'-inuana ivi-wahani Paulo yana leta naona me Korinita wayahia, ka leta v'-itonuna ivi-wahani Paulo yana leta v'-inuana me Korinita wayahia. Mataina taina nihenina Paulo ipuipupu 1 Korinita wayahina.

ananina uvaniahe deina, kadu habuhabuka kanua-vita ananina.^{◊ 2} Aituhu yauke ayapoyapomi unua-vita, kaiwadi, apaina aviyaivia ai pata ivo-vi-dewa-haiawiu? Eha aitam. Iuna yau dewa-haiawa vin'-omo itomi wayahimia. Ka aituhu unua-vita, medeina uvo-vi-dewa-haiawiu? Eha ami pata.³⁻⁴ Wayahina, yami leta-nana yau viha wayahina, kadu yau nua-vita wayahina, kadu yau tou wayahina aginumi. Iuna yau nuanua yau dune-nuanuai wayahimi un'-anamaniei. Eha yau nuanua unua-vita yau vona leta-nana nihenina wayahina. Kate yau nuanua yawaimi uvo-vi-tunuhi. Na-iakwa, e avi tuta avin'-omo wayahimia, eha nau-wawaniu anua-vita wayahimi. Iuna itomi nau-wawanimi uvo-vi-dewa-haiawiu. Ka kadu avitumahanemi yau vonana leta-nana nihenina uniononi, uvi-ateteyei, uvidoha, e nui kadewa-haiawa deina.^{◊ 5} Nonova, aitam onoto wayahimia nua-vita nau-vevwanei, ka yana dewa wayahina nua-vita tupwana avaniahei, kate itomi nua-vita ananina uvaniahei. Avonavona deina iuna eha yau nuanua tauna ayapoyapo, ka eha yau nuanua avitevite.⁶ Iuna itomi avaha uyapoyapoi, ka tauna avaha dewa-yaiyai vaniahei habuhabumi wayahimia. Ka aviani tauna avaha vaniahei ana pata deina.⁷⁻⁸ Wayahina, tuta ataina wayahina nau-wawanimi unua-piahi, kadu udewa-bigebigei. Iuna aituhu eha udewe deina, kaiwadi tauna vita ananina

^{◊ 2:1:} 1Ko 4:21. ^{◊ 2:3-4:} Dew 20:31.

vaniahe, e yawaina na-goyo ananina. Wayahina, yau nuanua onoto-nana uviwavenei udune-nuanuai-havinei.

⁹ Nonova yami leta-nana aginumi iuna yau nuanua an'-anamanemi itomi yami dewa medeina. Kaiwadi, ami nau-dadana avenemi uvane-tawanei, o medeina? Kadu kaiwadi, yau vona habuhabuna leta-nana nihenina uvi-ateteyei, o medeina? Wayahina, yami leta-nana aginumi ava-tawanei omo wayahimia adueyei. ¹⁰ Aituhu onoto-nana ya goyona unua-piahi, akanai yauke kadu goyo-nana anua-piahi aitamoata deina. Ka aviani yauke anua-piahi, aituhu tauna aitam goyona deweい wayahiua, akanai Tau Ito-yavuha matana anua-piahi, ka adewei deina iuna yau nuanua aivaitemi. ¹¹ Aituhu eha onoto-nana kanua-piahi, kaiwadi Satana tauna ya nua-uya wayahina ana pata anamane-tawaneka. Ika, avaha tauna ya vi-nua-hauhau vitupui wayahika kanamanei.[§]

¹² Nonova aomo meagai Tiroasi wayahina, e Tau Ito-yavuha vaneana anau-waheyei, ka Kauvea avaha etawana vo-vi-aiaia wayahu, e yau nau-wahe-nana vo-vi-meani.[§] ¹³ Kate meagai tenoke wayahina nua gomagomanina eha wayahiua. Iuna eha vaneika Titusi ata-vaniahe. Wayahina, me Tiroasi anau-kapoi ani-tawanei, aomoi papani Masedonia, e tenoke anaunau-nene Titusi wayahina.[§] ¹⁴ E tenoke avaniahei. Ka tutana tauna ya mataeda

[§] **2:11:** Luk 22:31. [§] **2:12:** Dew 14:27; 1Ko 16:9. [§] **2:13:** Dew 20:1.

wayahimi anononi, adewa-haiawa ananina. Wayahina, Yaubada anau-kaiwei. Iuna tuta tuta tauna itoai Tau Ito-yavuha nihenina amamaei eta-naonaoeai ya pai dewa-haiawa wayahina, ka tauna nui adewa-haiawa. Ka aveta baina aneine, tauna awaeheai vaneana ahihi-vainena wayahiaia hunahuna, buyeta manina ahiahina, e tomotau imaumau deina. ¹⁵ Ka tupwai tomotau Tau Ito-yavuha ivitumahanei, ka ito-yavuha ivaniahei itoai yama nau-wahe wayahina, ka tupwai ivihahaiei, ianianiga. Ka yama dewa vivane Tau Ito-yavuha yana dewa deina. Wayahina, yama dewa manina ahiahina Yaubada matana, Tau Ito-yavuha deina. ¹⁶ Ka tomotaui vaneana ivihahaiei wayahia, itoai vivane aniga manina mavununa wayahina, tau matena deina. Kate tomotaui ivitumahanei wayahia, akanai itoai vivane yawaina ahiahina manina, buyeta deina.

Ka aviyaivia ai pata paisewana idedewe tunuhina? Avonemi eha habuhabui.¹⁷ Tupwai tomotau inaunau-wahe, kate taui yai nuanua ananina kina ivaniahei ai nau-pata yai paisewa wayahina. Kate itoai eha taui deina. Eha-ohota. Itoai Tau Ito-yavuha nihenina amamaei. Wayahina, tuta tuta anuanua yama nau-wahe habuhabuna Yaubada matana. Wayahina, Yaubada yana vona anaunau-waheyei tunutunuhina. Iuna itoai ama tau vi-tune vivane Yaubada, ka apaina nau-wawaniai tauna wayahina avona-nau-pata yama paisewa wayahina.

¹⁷ **2:16:** Luk 2:34; 2Ko 3:5-6.

3

1-3 Kaiwadi, unuanua nau-wawaniai yama leta taui ai wava anani wayahia aviwavenemi, ami pata uvitumahaneai avi-tau hae-hoiai Iesu wayahina? Tupwai tomotau yai dewa deina, kate avonemi yama dewa eha deina. Iuna itomi taumi aitam leta deina. Ka tau ginuma ana wava ani-vainena, vivane Tau Ito-yavuha ana heta. Tauna leta-nana ginumi nuami nihenina. Ka leta-nana eha ta-ginumi pepe na kwautona wayahina. Kate tauna ginumi Yaubada Yawayawaina Nuana wayahina. Eha ta-ginumi hanu mumuyewina nihenina, nonova Moses ya veimea deina. Kate tauna ginumi itomi tomotau nuami nihenina. Nonova itoai Tau Ito-yavuha vaneana amataedami tunutunuhina, uvitumahanei. Akaka dewana wayahina itomi ami pata un'-anamanei tauai tau hae-hoiai Tau Ito-yavuha wayahina.

O kaiwadi, nau-wawaniai yama leta itomi wayahimia mani tomotau aviwavenei ai pata ivitumahaneai avi-tau hae-hoiai Tau Ito-yavuha wayahina? Avona-havinemi eha. Iuna mani tomotau avaha yawaimi vovouna vaneana inononi, kadu taui ai pata idudueyei nonova yama paisewa Tau Ito-yavuha wayahina adedewei tunutunuhina deina. Wayahina, ivitumahaneai avi-tau hae-hoiai Tau Ito-yavuha wayahina.[☆]

4 Itoai avonavona deina, iuna ate-vatu Tau Ito-yavuha nihenina Yaubada matana, e avitumahaneai avi-tau hae-hoiai. **5** Ama heta

[☆] **3:1-3:** 2Ko 5:12; Dew 18:27; 1Ko 9:2; NiT 24:12; Ier 31:33; Ese 36:26-27.

eha ama pata tau hae a paisewa wayahina, kadu eha ama pata avona-vanevane yama bagibagi wayahina. Kate vona ahiahina, Yaubada yama bagibagi veneveneai, ka tauna dedewe yeai ama pata yama paisewana wayahina. ⁶ Tauna deweyeai ama pata avi-tau hae Awaeha Vovouna wayahina. Ka awaehana vovouna eha veimea tutuaina deina. Mosese ya veimea tutuaina nihenina veimea tunina tunina imamaei, ka veimeana voneka nau-wawanika veimea aitamoata aitamoata kavi-ateteyei. Aituhu veimeai wayahia aitamoata katana-bwegei, akanai aka dewa-yaiyai kavaniahei, vivane aniga. Kate Awaeha Vovouna bigana. Iuna Nuana Ahihinata vin'-omo wayahikaia, e tauna yawai-vavaha veneneka.⁷

⁷ Nonova, tutana Yaubada Mosese veimea tutuaina venei, dewana na didigana vin'-omo. Unuani. Yaubada veimeana ginumi hanu mumuyewina nihenina, ka veimeana aniga omanei tomotau-naia wayahia. Kate vona ahiahina, dewana na didigana vin'-omo. Wayahina, dewana a pai vi-putu wayahina, me Isiraeli eha ai pata Mosese tepana wayahina idunedune, iuna didigana mahemaheina matai aniania. Kate didiga-nana eha ta-maheta-vavaha.⁸ ⁸ Ka aituhu aniga an' awaeha didigana kutakutana deina, kaiwadi, yawai-vavaha an' awaeha didigana medeina? Yawai-vavaha an' awaeha didigana aniga an' awaeha didigana mahete-tawanei. Iuna yawai-vavaha an' awaeha omo Nuana

⁷ **3:6:** Ier 31:31; 1Ko 11:25; Ioni 6:63. ⁸ **3:7:** NiT 34:29.

Ahihinata wayahina. ⁹ Nonova Mosese ya paisewa veimea tomotau venei, ka veimeana tutuaina itoka tomotau yapoka, kadu aka dewa-yaiyai yaka dewa goyona wayahia vona-dabababaka. Paisewana eha aitam pai dewa-haiawa tomotau wayahika, kate vona ahiahina, nonova paisewana didigana mamaei. Ka tuta ataina wayahina itoai yama paisewa vovouna tomotau aivaitei yawai tunutunuhi ivaniahei Yaubada wayahina. Yama paisewa vovouna pai dewa-haiawa ananina tomotau wayahika. Wayahina, paisewana vovouna didigana paisewana tutuaina didigana vane-tawane-vainei. ¹⁰ Ka aituhu paisewa tutuaina ka paisewa vovouna kabou-viwavei, avaha kadueyei, paisewa vovouna didigana paisewana tutuaina didigana mahete-tawanei. Wayahina, kana-vona, “Ataina tuta wayahina paisewa tutuaina didigana eha,” akanai. ¹¹ Vona ahiahina, awaeha tutuaina didigana mamaei, kate eha Yaubada ya nuanua awaehana na-ma'-vavaha. Kate awaeha vovouna vitumahana wayahina na-ma'-vavaha. Wayahina, memeanina kadueyei awaeha vovouna didigana ani-vainena. ¹² Akaka itoai anamane-yehai Awaeha Vovouna vivane ma'-vavaha. Wayahina, yama ate-vatu bagibagina wayahina apaipaisewa. ¹³ Nonova Mosese tepana mahemaheta, kate munia mahetana iopu iweu. Ka avi tuta mahetana opuropu, eha Mosese ya nuanua me Israeli tepana idudueye. Wayahina, tauna tepana

[◊] 3:9: VV 27:26; Rom 1:17.

tana-potei hivhivei. Kate itoai yama dewa eha Mosese yana dewa deina. Wayahiaia eha aitam aviani nau-wawanai ahivehive, kate ate-vatu wayahiaia apaipaisewa.[⊗]

¹⁴ Nonova me Isiraeli eha didigana maimaiovina ita-dueye, iuna Mosese pai bwa' boui, e tepana tana-potepotei. Wayahina, tomotaui nuai eha it^l-am-hau Yaubada awaeha tutuaina wayahina. Iuna Yaubada deweyei mwagewagei imamaei. Ka tuta ataina wayahina deinake. Iuna avi tuta me Iudea inau-hohona yai manua tapanono nihenia, taui awaeha tutuaina inononi, kate aitam pai bwa' nuai bwaei. Wayahina, eha ai pata veimea tutuaina a pai mini in^l-anamane. Ka pai bwae-nana mamaei a itoava tuta ataina wayahina. Eha aitam koiaka wayahia ana pata n^l-epa-yavune. Iuna vitumahana Tau Ito-yavuha wayahina ana heta ana pata pai bwae-nana n^l-epa-yavunei. ¹⁵ Nonova a itoava tuta ataina wayahina, aituhu avi tuta Mosese ya veimea inononi, pai bwae-nana nuai bwaei, ka eha ai pata veimeana a pai mini ananina in^l-anamane. ¹⁶ Kate aituhu aviyaivia ivi-nua-dadani Kauvea ivitumahanei, tuta aitamoata wayahina pai bwae-nana iakwa, e nuai am-haui, e ianamanei tunuhina.[⊗] ¹⁷ Ka avonemi, Kauvea-nana vivane Nuana Ahihinata. Ka aituhu Nuana Ahihinata nui kamamaei, Satana eha ana pata na-veimeyeka. Eha nau-wawanika naona veimea tutuaina kavi-ateteye, e munia ito-yavuha kavaniahe deina. Eha.[⊗] ¹⁸ Kate

[⊗] **3:13:** NiT 34:33. [⊗] **3:16:** NiT 34:34. [⊗] **3:17:** Ioni 8:36; Rom 8:2.

itoka tau vitumahana habuhabuka avaha Kauvea didigana kadudueyei. Ka mani tomotau ai pata didigana idudueyei tepakaia. Iuna eha aitam pai bwa' Kauvea didigana tepaka niwania mamae. Ka tuta ataina wayahina Nuana Ahihinata vo-vinevineka, e Kauvea tauna didigana veneveneka, e kikituna kikituna wayahina didigaka natanata. Kauvea-nana vivane Nuana Ahihinata.

4

¹ Yaubada ate-nuanuaieai, e tauna yama paise-wana veneai. Wayahina, itoai eha ate-vatu ata-vo-haini. ² Ka avi dewa hivahivai ka goyo-goyoi, o kadi avi dewa wayahia ini-yauyau avaniahe Yaubada matana, akanai, dewaia avihahaiei. Eha tomotau anonoi taui Iesu ivitumahanei, ka kadu eha Yaubada yana vona anau-vinia. Eha-ohota. Itoai yama nau-wahe vona tunutunuhina avona-vuvunaha Yaubada matana. Ka tomotau habuhabui ai pata yama dewa idudueyei. Wayahina, taui ai ayaunena nihenina ianamaneai tunutunuhiae. [☆]

³ Kaiwadi, tupwai tomotau nuai eha t'-am-hau, ka nuai novanovanina nihenina imamaei. Iuna aitam pai bwa' nuai tana-potei. Wayahina, yama nau-wahe ivihahaiei, e ianianiga. ⁴ Satana tanopi taina a yaubada, ka tauna avaha nuai tana-potei. Wayahina, taui Tau Ito-yavuha vaneana eha ita-vitumahane. Iuna nuai nihenina eha ai pata didigana a maheta idueye. Ka Tau Ito-yavuha-nana Yaubada viwaveneka. [☆]

[☆] **4:2:** 2Ko 2:17; 1Te 2:5. [☆] **4:4:** Epe 2:2; Kol 1:15; Ebe 1:3.

⁵ Ka itoai yama nau-wahe medeina? Kaiwadi, avonemi yauke Tau Ito-yavuha? Eha. Itoai yama nau-wahe vivane Iesu Tau Ito-yavuha, tauna yaka Kauvea, ka itoai yami tau paisewa-kavokavovo, e apaipaisewa tauna wayahina deina. ⁶ Nonova Yaubada ivona,

“Maheta vi-putu vanevane novanovanina nihen-inina.”

Ka aitamoata deina, Tauna maheta vevewanei itoai nuai nihenina, ka nuai am-haui, e Yaubada didigana adueyei Tau Ito-yavuha tepana wayahina.⁷ ⁷ Nua-uyana wayahiaia, ka nua-uyana patana kina ani-vainena vane-tawanei. Kate Yaubada tauna nua-uyana veneai ininiai apunavina taina nihenina. Wayahina, anuani avi bagibagi wayahiaia mamaei, bagibagi-nana omo Yaubada wayahina, eha itoai wayahiaia. Ka bagibagi-nana mani bagibagi bagibagi-tawanei.⁸ ⁸ Tuta tuta vitana avaniahei, kate eha yama paisewa ata-vo-haini, ka eha ata-genuana. Ka tupwai tuta nuai vi-tupatupa, kate dewaia eha ibagibagi-tawaneai.⁹ Tomotau idewa-yaiyaieai, kate Kauvea eha ta-ni-tawaneai. Taui ivunuvunuai, kate eha ita-vita-vovoniai. ¹⁰ Tuta tuta yawaiai nihenina tomotau ai pata Iesu yan' aniga idudueyei. Iuna ininiai taina ihanuai. Kate tuta aitamoata wayahina tomotau kadu ai pata Iesu yawaina idudueyei. Iuna ya bagibagi

⁷ **4:6:** Nao 1:3; Isa 9:2; 2Ko 3:18. ⁸ **4:7:** 2Ko 5:1. ⁹ **4:8:** 2Ko 1:8; 7:5.

paipaisewa ininiai ihanuai nihenina.[☆] **11** Vona ahiahina, itoai yawayawai tanopia, kate tuta tuta eha ani-hoina aniga avaniahei iuna yama paisewana Iesu wayahina. Ininiai ihanuai kadu aninigai. Kate yawai-vavaha tauna wayahina ininiai nihenina mamaei. Ka avi tuta tomotau idudueyeai kadu tauna yawaina idudueyei.[☆] **12** Dewe ainua ivin'-omo yama paisewana wayahina. Aniga paipaisewa itoai niheniaia, kate yawaina paipaisewa itomi nihenimia.

13 Iginuma aitam ivona,

“Avitumahanei. Wayahina, avonavona deina.”

Ka tuta ataina wayahina vitumaha-nana bagibagina aitamoata wayahina avonavona.[☆] **14** Iuna itoai avaha Yaubada anamanei. Tauna Kauvea Iesu si-vi-mini-havine anigea, ka apaina tauna kadu itoai nui na-si-vi-mini-havineai anigea. Ka auyewana wayahina Yaubada taumi nui omaneka Iesu matana.[☆] **15** Ka itoai dewai vitai taina habuhabui awaehei avaniahei, iuna avaha anamanei itomi uvidoha wayahia. Iuna tomotau habuhabui Yaubada yan' am-venena awawaehina ivaniahei deina. Ka munia, taui yai nau-kaiwa Yaubada wayahina iam-iwaiwahi, e dewana tauna didigana na-vo-vi-natei. **16** Wayahina, eha ate-vatu ata-vo-haini, kadu eha yama paisewana ata-bou-oho. Vona ahiahina, itoai ama inipu peupeu, kate niheniaia Kauvea nuai vo-vi-vovoui auyewa

[☆] **4:10:** 1Ko 15:31. [☆] **4:11:** Rom 8:36. [☆] **4:13:** Sam 116:10.

[☆] **4:14:** 1Ko 6:14.

ayewa.[◊] ¹⁷ Akanai, baina tanopia ama vita avaniahei. Kate aituhu vita-naia habuhabui anau-itavai, ka aituhu itoai didigai ma'-vavaha ainua abou-viwavei, vona ahiahina, vita-naia habuhabui memeani, kadu tuta eha ani-hoina na-iakwa wayahina, eha kadu aitam tuta an'-ayaune. Ka itoai didigai ma'-vavaha vitai habuhabui vane-tawanei.[◊] ¹⁸ Wayahina, aviani baina tanopia aka pata kadueyei matakaia, akanai dewaia avihahaiei. Ka dewai wahuma imamaei eha aka pata kadueyei matakaia. Dewaia baina tanopia maimaiovina, ka dewaia wahuma ima'-vavaha. Wayahina, dewaia wahuma imamaei kanua-vi-anai.[◊]

5

¹ Ininiai taina nihenina amamaei, ine deina. Iuna ininiai nau-wawani tuta kutakutana wayahina. Ka avaha anamanei aituhu tomotau ininiai taina ivita-vovoni, akanai kadu aitam inini mamaei, ka inini-nana yama manua wahuma ma'-vavaha, ka manuana a tau yona vivane Yaubada, eha tomotau.[◊] ² Ka tuta ataina a itoava auyewana wayahina, mani viha mani viha ayaunei, kadu atoutou. Iuna yama nuanua ananina ininiai vovouna aweteni, ka inini-nana nau-wawani wahuma wayahina.[◊] ³ Ka avaha inini-nana avaniahei, akanai eha nagonegoneai, iuna nuai avaha ininina vovouna weteni. ⁴ Avonavona deina iuna yama tuta tanopia wayahina ine taina nihenina atoutou, ka vita tunina tunina avaniahei. Eha

[◊] 4:16: Epe 3:16. [◊] 4:17: Rom 8:17-18. [◊] 4:18: Kol 1:16.

[◊] 5:1: 2Ko 4:7. [◊] 5:2: Rom 8:23.

yama nuanua nagonegoneai amamaei, kate yama nuanua ininiai ma'-vavaha aweteni, vivane ininiai wahuma wayahina. Ka avi tuta aweteweteni deina, vona ahiahina, kana-vona, "Yawai-vavaha avaha aniga tononi iakwa".

⁵ Yaubada vevewaneka, iuna ya nuanua ininika ima'-vavaha kavaniahei deina. Ka tauna avaha Nuana Ahihinata veneka, e an'-anamanei tauna ya vona-dabadaba ininika ima'-vavaha wayahina nuani, eha nuana ta-panipani. Wayahina, vona tunuhina, apaina ininika ima'-vavaha kavaniahei.

⁶ Wayahina, tuta tuta yama vitumahana bagibagina mamaei, kadu anamanei aituhu ininiai taina nihenina amamaei, eha ama pata Kauvea nui wahuma amamae.[◊] ⁷ Yawaiai omo yama vitumahana wayahina. Ka aviani ama pata tanopi taina wayahina mataia adudueyei, dewanai eha ata-vitumahane. ⁸ Avona-havinemi, avaha anamanei, apaina Yaubada tauna ya vona-dabadaba veneai avaniahei. Wayahina, yama nuanua aituhu ama pata ininiai taina ani-tawanei, e Kauvea avaniahei, vona ahiahina, adewa-haiawa, iuna avidoha-vaine deinake.[◊]

⁹ Wayahina, yama nuanua ananina tauna avo-vi-dewa-haiawi. Aituhu ininiai taina nihenina amamaei, o aituhu ininiai taina ani-tawanei, yama nuanua ananina aitamoata, vivane tauna avo-vi-dewa-haiawi.[◊] ¹⁰ Yama nuanua avo-vi-dewa-haiawi deina. Iuna aitamoata aitamoata wayahikaia nau-wawanika Tau Ito-yavuha matana kamimini, ka auyewana

[◊] **5:6:** Ebe 11:13-16. [◊] **5:8:** Pili 1:23. [◊] **5:9:** Kol 1:10; 1Te 4:1.

wayahina tauna manuena tau vaneneha ya
pai manuena ahihi-vainena wayahina, ka aka
nau-pata vi-nua-dadani yaka dewa wayahi.
Aviani ininikaia kadedewe, aituhu ahiahina o
aituhu goyona, akanai aka nau-pata kavaniahei
aitamoata deina. [◊]

*Nau-wawanika Yawaika Kawaehi Iesu
Wayahina*

¹¹ Itoai avaha Kauvea anamanei, kadu am-
atamatautei. Wayahina, adewa-dadani yama
nau-wahe wayahina mani tomotau amataedai
yai goyona wayahi inua-vinana. Ka vona ahi-
ahina, Yaubada avaha anamaneai, ka yau nu-
anua kadu itomi un'-awaehi vivane itoai yama
vona ka yama dewa aitamoata.

¹² Yama vonana wayahimia eha ta-omo yama
nuanua ama wava asi-nai matamia. Eha.
Avonavona deina iuna yama nuanua aivaitemi
un'-awa-vidovidohai. Kaiwadi, munia itomi
ami pata taui ivona-vanevane yai dewa tanopi
taina wayahina uvona-nau-patai tunuhina. Taui
nuai nihenina awakabi.

¹³ Aituhu yama dewa ana dune
avi-kwavakwava, yama dewa adedewe deina
iuna Yaubada adewa-vidovidohai ananina.
Ka aituhu yama dewa ana dune anuanua
tunuhina, yama dewa adedewe deina,
iuna adedewe wayahimi. ¹⁴ Yama dewa
habuhabui adedewe, iuna Tau Ito-yavuha ya
dewa-vidovidoha veimeyeai adedewe deina.
Iuna avaha avitumahanei onoto aitamoata aniga
tomotau habuhabuka wayahika. Wayahina,

[◊] 5:10: Hae 12:14.

nau-wawanika kana-vona habuhabuka avaha kaniga deina! ¹⁵ Ika, tauna aniga habuhabuka wayahika. Ka ya nuanua wayahika eha yawaika kanua-tania, e itoka kaveimeyeka. Kate nau-wawanika yawaika kawaehai tauna wayahina. Iuna tauna aniga wayahika, kadu avaha anigea mini-havine.[◊] ¹⁶ Wayahina, tuta ataina eha a ito-vewana wayahina, nau-wawaniai tau ma' tanopi yai dewa aitam taina avihahaiei. Naona tau ma' tanopi mani tomotau yai dewa ai dune idudueyei, e munia kadi ivi-nua-dadani tomotaui ahiahia, o kadi ivi-nua-dadani tomotaui goyogoyoi. Kate dewana eha tunuhina Yaubada matana. Vona ahiahina, tuta nonova wayahina, Tau Ito-yavuha yana dewa ai dune wayahina avi-nua-dadani tauna onoto goyona. Kate tuta ataina wayahina eha anuanua tauna wayahina deina. ¹⁷ Wayahina, aituhu aviyavia Tau Ito-yavuha nihenina imamaei, akanai taui tomotau vovoui. Ka aviani nonova Satana wayahina omo yawai nihenina mamaei, dewaia tutuaina iakwa. Ka aviani tuta ataina wayahina yawai nihenina mamaei, dewaia vovouna iomo Yaubada wayahina.[◊] ¹⁸ Dewaia habuhabui iomo Yaubada wayahina. Nonova itoka tomotau tauna a havia, kate ya nuanua haviana na-iakwa. Wayahina, tauna yaka Tau Ito-yavuha vi-tunei omo wayahikaia, ka yan' aniga haviana nau-yehai. E itoka nua gomagomanina kavaniahei deina. Ka kadu Yaubada yama paisewa veneai, vivane

[◊] 5:15: Rom 14:7-8. [◊] 5:17: Rom 8:1; Gal 6:15.

tomotau habuhabui yana dewa amataedai, in'-anamanei.^{☆ 19} Yaubada ya nuanua itoka tau ma' tanopi nua gomagomanina kavaniahei tauna wayahina, iuna Tau Ito-yavuha yana dewa wayahina. Vona ahiahina, yaka dewa goyona wayahia itoka nau-wawanika dewa-yaiyai kavaniahe. Kate Yaubada aka dewa-yaiyai kweui. Kadu tauna dewana vaneana a paisewa veneai, e tomotau amataedai.^{☆ 20} Ka itoai avaha avi-tau ipupu Tau Ito-yavuha wayahina. Ka ataina Yaubada ipuipupu-tomotauemi itoai yama nau-wahe wayahina deina. Ka Tau Ito-yavuha ya nuanua nua gomagomanina Yaubada wayahina uvaniahei. Wayahina, tuta ataina wayahina itoai Tau Ito-yavuha a tau nau-seana, ka ahidahidami un'-awaehi deina. ²¹ Udu! Iesu tau tunutunuhina. Eha aitam yana dewa goyona. Kate Yaubada tauna dewa-yaiyaiei tau goyona aitam deinake, vivane tauna itoka tomotau goyogoyoka aka tau nau-seana. Ka Yaubada ya nuanua itoka tomotau Tau Ito-yavuha a nau-pata ahiahina yana dewa tunutunuhina wayahina kavaniahei.[☆]

6

¹ Ka itoai Yaubada nui apaipaisewa. Wayahina, ahidahidami eha Yaubada yan' am-venena awawaehina wayahimi udewa-kavokavovoe.

² Iuna tauna ivona,

“Tuta ahiahina nihenina yami viama anononi,
e anau-patami ahiahina,

^{☆ 5:18:} Rom 5:10. ^{☆ 5:19:} Rom 3:23-25. ^{☆ 5:21:} Ebe 4:15.

ka kadu ito-yavuha an' auyewa wayahina
ana-ivaitemi.”

Ka yauke avonevonemi, tuta ataina vivane
tuta-nana ahiahina Yaubada wayahina
na-ivaitemi, ka kadu tuta ataina vivane
ito-yavuha an' auyewa-nana.[◊]

Iesu A Tau Hae Anani Ibebebewa

³ Eha aitam pai vito-paine ata-boubou
tomotau yai etawana nihenina. Iuna yama
nuanua yama paisewa an' anamana mamaei
ahiahina tomotau habuhabui mataia. ⁴ Vona
ahiahina, itoai Yaubada ya tau paisewa.
Wayahina, nau-wawanai yama dewa aitamoata
aitamoata adune-vi-avini ahiahina. Ika, tuta
tuta nau-wawanai atoha-vi-anai ananina,
ka tuta tuta vita, ka viha, ka kadu inahe
avaniahei, ⁵ ka kadu vunua, ka yohona, ka
vitana-wahewahe, ka kadu paisewa vitana,
ka ioyoma eha ama pata aino-aineai, ka am
anavovo,[◊] ⁶ ka kadu dewa hadahadanina
kadedewe, ka abebbewa mani tomotau yai
dewa anua-haui, ka taui wayahia atoha-vi-anai,
ka dewa bigana adedewe, ka kadu yama paisewa
apaipaisewei Nuana Ahihinata nihenina, ka
yama dewa-vidovidoha eha vitupu.[◊] ⁷ Ka yama
vona vivane vona tunutunuhina, ka ama havia
anau-havie Yaubada ya bagibagi wayahina, ka
kadu dewa tunutunuhi wayahia avi-naua kadu
abou-pota. Wayahina, yama dewa tau nau-havia
yai dewa deina, vivane taui nima ateia ivi-naua,
ka nima akenia ibou-pota. ⁸ Ka aituhu tomotau

[◊] **6:2:** Isa 49:8. [◊] **6:5:** 2Ko 11:23-27. [◊] **6:6:** 1Ti 4:12.

didigai ivo-vi-natei, o aituhu iapa-goyogoyoeai, ka aituhu vane goyona anononi, o aituhu vane ahiahina anononi, akanai itoai eha ata-genuuna yama paisewana wayahina. Ika, itoai tau hae-hoiai, kate mani tomotau inuanua itoai tau vitupu.⁹ Ka Yaubada anamaneai, kate tomotau inuanua itoai ama wava eha aitam aviani. Ka tuta tuta ama dune anianiga, kate nonova a itoava tuta ataina wayahina itoai yawayawaiai. Ka ai vi-am tuta ivunuvunuai, kate eha ita-nau-vi-anigiai.¹⁰ Ka itoai yama nua-vita wayahiaia, kate tuta tuta adewa-haiawa. Tanopi taina a gugua wayahi itoai tau payapayayai, kate tomotau habuhabui ivi-tau kaikaiwabo wahuma a gugua wayahi iuna yama paisewa. Ka ama dune awakabiai, kate avi gugua Iesu wayahina, akanai guguaia habuhabui wayahiaia mamaei yama gugua.

¹¹⁻¹² Me Korinita, tupwami unuanua itoai eha adune-nuanuaiemi, kadu tupwami unuanua avaha atana-tavunemi. Kate eha. Itoai avona-vuvunaha wayahimia, kadu avaha ama nau-dadana habuhabuna ahaeyei ivin'-omo wayahimia, e avaha uanamane-yehai. Itoai eha yama dune-nuanuai avito-potami, kate itomi yami dune-nuanuai uvito-potai.¹³ Tuta ataina wayahina, yauke Paulo, avonevonemi natunatu deina, iuna yauke yami vitumahana amana deina. Ka aituhu yaka dewa tunuhina, akanai, nau-wawanimi udune-nuanuaieai, adune-nuanuaiemi aitamoata deina.[☆]

Tau Vitumahana Ka Tau Va-hamwahamwana

[☆] **6:9:** 2Ko 4:10. [☆] **6:13:** 1Ko 4:14.

Ainua

¹⁴ Eha nau-wawanimi uawaehi aitamoata taui eha ivitumahana wayahia. Unononi avonemi. Medeina dewa tunutunuhina ka dewa goyogoyona ainua iawaehi aitamoata? Eha ai pata. O kaiwadi, medeina maheta ka novanovana ainua ivi-yaiana? Eha ai pata.¹⁵ ¹⁵ O medeina Tau Ito-yavuha ka Satana ainua iawaehi aitamoata? Eha ai pata. Wayahina, medeina tau vitumahana ka tau va-hamwahamwana ainua iawaehi aitamoata? Avonemi, eha ai pata. ¹⁶ O medeina Yaubada ya manua vito-pota ka yaubada vitupu ainua iawaehi aitamoata? Eha ai pata. Itoka tau ekalesia vivane Yaubada Yawayawaina ya manua vito-pota. Ka tauna avaha vonei deina, ivona,

“Yauke taui nui kamamaei, ka nui kani-awana.
Ka kadu Yauke ivi-wahaniu yai Yaubada,
ka taui avi-wahani yau tomotau.”

ka kadu aitam iginuma Iginuma nihenina ivona,¹⁷

¹⁷ “Kauvea ivona, ‘Wayahina, itomi nau-wawanimi
mani tomotau uni-tawanei,
utana-vewani.

Ka eha taui nui unau-tamoia.
Eha aitam aviani gawagawamina
uvo-dadani.
E yauke anau-kaiwemi avi-yaianemi.’ ”

ka kadu aitam iginuma Iginuma nihenina ivona,¹⁸

¹⁸ **6:14:** Epe 5:11. ¹⁸ **6:16:** 1Ko 3:16; Lev 26:12. ¹⁸ **6:17:** Isa 52:11; SiV 18:4.

18 “Kauvea Bagibagi-vainena ivona,
 ‘Apaina Yauke Amami,
 kadu itomi natunatu ononotomi
 ka natunatu vaivinemi.’ ”¹⁸

7

¹ Yaiau, avaha Yaubada ya vona-dabadaba wayahika avona-havinemi deina. Wayahina, itoka nau-wawanika yawaika, kadu ininika, kadu nuaka kahadahadani dewa gawagawami wayahia. Nau-wawanika kadedewe deina, kadu nau-wawanika kadewa-didiguna Yaubada wayahina, iuna tauna kamamatamatautei. Ka munia, kamamaei ahihikata.

² Avona-havinemi, itomi nau-wawanimi ami nau-dadana habuhabuna uhaeyeai ivin'-omo wayahiaia, an'-anamane-yehaimi. Eha aitam koiaka wayahimia ata-dewa-goyona wayahina. Ka kadu eha aitam koiaka wayahimia yawaina ata-vi-goyo, ka eha aitam ata-nono. ³ Yau vonana a pai mini wayahina eha ayapoyapomi, iuna avaha nuai uepei. Ka avaha avonemi, adune-nuanuaiemi ananina. Wayahina, aituhu nui kamamaei o aituhu nui kan'-aniga, akanai ainua wayahia adewa-haiawa. ⁴ Ka avaha anamanemi yami nuanua dewa tunuhina udedewe, ka adewa-haiawa vaneami-nana wayahina. Ka kadu yau nuanua avaha vidoha wayahimi. Ataina tuta wayahina yama vita ivi-habu, kate akanai, wayahimi adewa-haiawa ananina.

⁵ Nonova, tutana aomo papani Masedonia wayahina, eha au pata avi-yawai. Iuna

¹⁸ **6:18:** 2Sa 7:14; Ier 31:9.

tuta-nana wayahina ma' vitana habuhabuna ininiu nihenina avaniahei, kadu nuau nihenina amatamatauta.^a [◊] ⁶ Kate Yaubada yana dewa taina deina. Aituhu aviyaivia inua-vita, tauna vo-vi-dewa-haiawi. Ka kadu tauna vo-vi-dewa-haiawiu deina, iuna tauna Titusi omanei wayahiua. ⁷ Ka kadu avaha vaneami Titusi wayahina anononi, akanai adewa-haiawa ananina. Iuna tauna voneu, ivona, "Me Korinita yai nuanua ananina en'-omo enau-vi-tau. Ka taui inua-vita ananina yai dewa goyona wayahi, ka avaha yam vona pai vo-vi-tunuha iawaehi aitamoata, ka kadu yai tou wayahina inua-vinana yai goyona wayahi, ka kadu inuanua ananina taum wayahim." Vonana wayahina ama inua adewa-haiawa ananina.

⁸ Nonova yami leta aginumi, ka leta-nana nihenina nau-wawaniu vona panina atotohi, ka leta-nana nuami vitevitei. Ka nonova anua-vita nau-wawaniu vonaia aginumi deina. Kate tuta ataina wayahina eha anua-vita vonana panina aginumi ava-tawanei omo wayahimia. Iuna tuta kutakutana ana heta wayahina unua-vita.[◊] ⁹ Ka tuta ataina wayahina adewa-haiawa. Yau dewa-haiawa taina eha ta-vin'-omo yami nua-vita wayahina. Vona ahiahina, yami nua-vita eta-naoemi unua-vinana. Ka yau dewa-haiawa omo yami nua-vinana wayahina. Yaubada tauna

^a **7:5:** Paulo aitam viviwava vi-putu Upwa 2 nihenina, ka viviwavana Titusi wayahina eha ta-nau-yehai, kate ni-tawanei mataina 2:13 wayahina, ka mani ipupu epe. Ka mataina 7:5 nihenina, Paulo ya viviwavana Titusi wayahina epa-havinei.

[◊] **7:5:** 2Ko 2:13. [◊] **7:8:** 2Ko 2:4.

ya nuanua nua-vitana uvaniahei, iuna ya nuanua ananina unua-vinana. Wayahina, yau dewa wayahimia eha dewa goyona, kadu eha avitavitami. ¹⁰ Vona ahiahina, aituhu nua-vita kavaniahei iuna Yaubada matana kaini-yauyau yaka goyona wayahia, nua-vita-nana vivane dewa ahiahina. Iuna nua-vita-nana eta-naoeka kanua-vinana, ka ito-yavuha kavaniahei deina. Kate tanopi a nua-vita eta-naoeka kan'-aniga-vavaha.^{† 11} Ka aviani vin'-omo yami nua-vitana wayahina? Udueyei! Dewa ahiah habuhabui ivin'-omo wayahimia nua-vitana wayahina, iuna nua-vitana omo Yaubada wayahina. Ataina tuta wayahina ubebewa tunuhina Yaubada ya etawana uvenauei. Ka kadu yami nuanua ananina dewa goyo-naia ubou-ohoi uni-tawanei. Ka Yaubada ana pata dudueyemi yami nuanua tunutunuhina. Ka kadu itomi nuami vi-tupatupa, kadu magami bawe goyo-nana wayahina. Umatamatauta dewa-yaiyai uvaniahei Yaubada wayahina, ka kadu itomi yami nuanua ananina an'-omo wayahimia kanau-vi-tauka. Ka yama vona wayahimia yami leta-nana nihenina unuanua ananina wayahi. Ka kadu yami nuanua ananina adueyei dewa tunuhina ivin'-omo yami ekalesia nihenina. Wayahina, tuta ataina wayahina au pata avonemi, yami dewa habuhabuna mataua ahiahina ana noe, ka eha aitam aviani goyona itupwa tuta nonova wayahina. Dewaia avaha iakwa.

¹² Vona ahiahina, yami leta-nana nihenina

^{† 7:10:} Mat 27:3-5; Ebe 12:16-17.

yau vona panina mamaei. Kate eha leta-nana ata-ginumi omo tauna ya goyona ananina wayahina, ka kadu eha leta-nana ata-ginumi omo tomotaui vitana ivaniahei onoto-nana yana dewa goyona wayahina wayahia. Eha. Leta-nana aginumi omo itomi tau ekalesia wayahimi. Ka yau nuanua itomi un'-anamanemi yau vonana wayahimia uvi-ateteyei. Ka nau-wawanimi Yaubada matana uvaniahei deina. ¹³ Ka dewa habuhabui ivin'-omo wayahimia ivo-vi-dewa-haiawiai, kadu ate-vatu.

Ka kadu yami dewa Titusi wayahina ahiahina, e kadu tauna uvo-vi-dewa-haiawi. Wayahina, yau dewa-haiawa nata-vaine, iuna nuana uvo-vi-vovoui. ¹⁴ Nonova Titusi nui amamae ka yauke awa-vidovidohemi tauna matana, ka eha ini-yauyau uta-veneu. Vona habuhabuna Yaubada wayahina avonemi vona tunutunuhina, ka kadu vona habuhabuna Titusi avonei wayahimi kadu vona tunutunuhina. ¹⁵ Iuna tutana Titusi omo wayahimia, itomi eha uta-nua-vane, kate yami nua-opu wayahina kadu yami tatatava wayahina unau-kaiwei. Kadu tauna nuani dewaia habuhabui leta-nana nihenina uvi-ateteyei. Wayahina, ataina tuta wayahina tauna dune-nuanuaiemi ananina. ¹⁶ Ka yauke kadu adewa-haiawa, iuna yami dewa ahiahina habuhabuna usi-vin'-omanei. Wayahina, yau vitumahana yami dewa ahiahina wayahina eha awakabina.

8

Ekalesia Papani Masedonia Nihenina Yai Dewa

1-2 Yaiau, yau nuanua ananina aviani vin'-omo ekalesia habuhabui papani Masedonia nihenina amataedami. Tuta ataina wayahina taui tau payapayaya, ka ma' vita ani-vainena ivaniahei. Kate yai nuanua ananina yai kina aitonuata ivi-nuia aitam am-venena-kavovo me Isiraeli wayahi. Ika, yai dewa-haiawa ananina iwaiwahi deina, ka avaha kinaia iboui. Wayahina, avaha Yaubada yan' am-venena awawaehina taui wayahia kadueyei.[◊] **3-4** Vona tunuhina ahaeyemi, me Masedonia ai heta yai nuanua am-venena-kavovo iveneu me Isiraeli tau ekalesia Ierusalem imamaei wayahi, kadu ihidahida-vaineai itoai awaehei ina-ivaitei deina. Ka avaha awaehei, naona taui aviani ai pata iveneu, kadu munia ai nau-wawani ibou hetana. **5** Itoai nuai vi-tupatupa taui yai dewa wayahina. Iuna taui yai dewa yama nuanua wayahi ivane-tawanei. Naona taui yawai iawaehi Kauvea wayahina, ka kadu munia Yaubada ya nuanua wayahi ivi-munie, e yama vona wayahia iawaehi aitamoata, ka kadu idedewe.

6 Me Masedonia yai am-venena-kavovo habuhabuna inau-yehai deina. Wayahina, Titusi ahidei, avona, "Nonova evi-putu me Korinita eivaitei yai am-venena-kavovo me Ierusalem wayahi ivo-vi-aiaia. Ka am-venena-kavovona omo ate-nuanuai wayahina. Ka tuta ataina wayahina nau-wawanim ena-ivaitei paisewana inau-yehai." Yau vonaia iakwa, e Titusi avi-tunei omo wayahimia. **7** Ka yauke avaha anamanem

[◊] **8:1-2:** Rom 15:26; 2Ko 9:1-2.

apaina dewaia habuhabuna wayahia itomi yami ekalesia mani ekalesia uvane-tawanei. Ika, aituhu vitumahana, o ipupu, o nua-uya, o nua hadahadanina wayahina, o kadi aituhu dune-nuanuai itoai wayahiae wayahina, o aituhu avi dewa kabou-viwavei, akanai itomi uvane-tawane-neiei. Wayahina, kadu nau-wawanimi am-venena-kavovona wayahina uvane-tawane-neiei deina.⁸ Eha aveimeyemi un'-am-venena-kavovo ananina deina. Kate yau nuanua aituhu itomi yami dewa mani ekalesia yai dewa abou-viwavei, au pata adueyei yami dewa-vidovidoha vavaneimi wayahi medeina. Kaiwadi, mani ekalesia yai dewa uvane-tawane-neiei, o kadi taui ivane-tawanemi? Apaina kadueyei.⁹ Avonavona deina wayahimia, iuna avaha yaka Kauvea Iesu Tau Ito-yavuha yan' am-venena-kavovo uanamanei. Am-venena-kavovona vin'-omo tauna yan' ate-nuanuai wayahina. Tauna ya kaikaiwabo ananina wahuma ni-tawanei, ka iopu tanopia, ka vi-tau payapayaya. Tauna ito-yavuhimi deinake. Wayahina, kana-vona itomi yami kaikaiwabo wahuma omo tauna ya vi-payapayaya wayahina.⁸

¹⁰ Ka yau vonana wayahina yau nuanua ana-ivaitemi am-venena-kavovona uvo-vi-aiaia. Vona ahiahina, ponimana iakwa wayahina, itomi yami ekalesia vivane ekalesia naona ekalesia habuhabui wayahiae nuanuami un'-am-venena-kavovo, kadu avaha uvi-putu am-venena-kavovona uvo-vi-aiaia. ¹¹ Nonova

⁸ 8:7: 1Ko 16:1-2. ⁹ 8:9: Mat 8:20; Pili 2:6-7.

yami nuanua ananina paisewana uvi-putu. Ka tuta ataina wayahina nau-wawanimi paisewana unau-yehai, e kadueyei yami nuanua kadu yami dewa vivane aitamoata. Ka nau-wawanimi yami am-venena-kavovona omo ami pata deina. ¹² Vona ahiahina, aituhu yami nuanua mamaei un'-am-venena-kavovo, ka aituhu avi gugua wayahimia uvenei aitamoata deina, akanai Yaubada dewana wayahina dewa-haiawa. Aituhu uvi-kutakuta, medeina kina eha wayahimia uvene? Eha ami pata.◊

¹³ Eha yau nuanua tuta tepakaia wayahina mani tomotau yai ma' vidoha, ka tuta aitamoata wayahina itomi uvi-kutakuta ananina, iuna uam-venena-kavovo ani-vainena wayahia. Kate yau nuanua tau ekalesia habuhabui yai ma' ahiahina ivaniahei. ¹⁴ Ka tuta ataina wayahina, itomi yami ma' ahiahina kadu tupwana hetana, ka me Ierusalem awakabi imamaei. Wayahina, aviani hetana mamaei wayahimia ana pata na-ivaitei, ividoha. Ka kadu tuta tepakaia wayahina, kaiwadi, aviani wayahia hetana maae ana pata awakabimi nau-vi-anaimi aitamoata deina. E taui itomi nui uvidoha aitamoata. ¹⁵ Ka Iginuma nihenina aitam vona mamaei, ivona,

“Tupwai ikwakwei ananina,
kate eha aitam aviani itupwa.
Ka tupwai ikwakwei kikituna,
kate eha ita-vi-kutakuta.”◊

◊ **8:12:** Mar 12:43-44. ◊ **8:15:** NiT 16:18.

¹⁶ Yaubada anau-kaiwei, iuna tauna avaha Titusi dune-nuanuai ananina venei wayahimi, yauke yau dune-nuanuai ananina wayahimi deina. ¹⁷ Wayahina, tutana am-venena-kavovona wayahina avonevonei, tauna awaeha aitamoata yau vonana wayahimia wayahina. Ka kadu ya dewa-haiawa ananina wayahina ya nuanua ananina na-nau-vi-taumi, e mataedami.

¹⁸ Ka kadu, vaneika aitam Titusi nui avi-tunei iomomo wayahimia. Ekalesia habuhabui vaneikana iawa-davedavei. Iuna ya paisewa Tau Ito-yavuha Vaneana Ahiahina wayahina ianamanei. ¹⁹ Ka kadu ekalesia habuhabui avaha tauna ivi-nua-dadanei, ka avi tuta am-venena-kavovona anau-hohoni-yehai, tauna nui aomanei Ierusalema. Am-venena-kavovo-nana adune-vi-avini, iuna yama nuanua Kauvea ana heta ana wava asi-nai, ka kadu yama nuanua ananina vavaneika Ierusalema ana-ivaitei. Ka munia, mani tomotau yama dewaia idueyei, e taui yama nuanua tomotau ana-ivaitei in'-anamanei. ²⁰ Yama nuanua taina deina. Aituhu tomotau yama dune-vi-avini am-venena-kavovo-nana ananina idune-vi-anai, eha ai pata aitam aviani goyona ivaniahei. Wayahina, eha ai pata in'-apa-goyogoyoeai. ²¹ Wayahina, yama dewa aitamoata aitamoata adune-vi-avini ahiahina, e Kauvea matana kadu tomotau mataia yama dewaia ai dune ahiahina ana noe.

²² Kadu vaneika v'-itonuna Titusi nui avi-tunei. Tuta habuhabuna wayahina vaneikana avaha yana dewa habuhabui wayahia viwaveneai

paisewa Tau Ito-yavuha wayahina nuana epeи toyoina. Ka ataina tuta wayahina tauna avaha itomi yami dewa ahiahina nononi, e vitumahanemi apaina dewa ahiahina udewei. Wayahina, Tau Ito-yavuha ya paisewa nuana epeи toyoina kadu hetana.

²³ Ka avaha Titusi uanamanei. Tauna au niau ahiahina, kadu tauna avaha Tau Ito-yavuha ya paisewa paisewei yami ekalesia nihenina, yauke deina. Ka tauna vavaneika nui iomomo, ka taui vivane tau hae ekalesia wayahia, ka Tau Ito-yavuha ana wava isi-nai. ²⁴ Wayahina, itomi nau-wawanimi yami am-venena-kavovona uvo-vi-aiaia tunuhina, e ononotoi taina habuhabui yami pai dune-nuanuai uviwavenei deina. E idueyei, in'-anamanei aitam iuna mamaei yama awa-vidovidoha yami dewa wayahina. E munia, ekalesia habuhabui yami dewa vaneana inononi in'-anamanemi tau ekalesia udune-nuanuaiei, wayahina in'-awa-vidovidohemi.◊

9

¹ Eha nau-wawaniu yami leta taina nihenina am-venena-kavovona tau ekalesia wayahi amataedami, iuna avaha uanamanei.◊ ² Ka kadu avaha yami nuanua ananina una-ivaitei anamanei. Wayahina, avaha apa-vidovidohemi me Masedonia wayahia. Ika, avonevonei deina, avona, “Taui papani Akaia nihenina avaha ibebewa yai am-venena-kavovo ivo-vi-aiaia ponimana iakwa wayahina.” Ka

◊ **8:24:** 2Ko 7:13-14. ◊ **9:1:** 2Ko 8:1-7.

tutana yami dewa vaneana taina inononi, taui kadu ivi-putu ibebewa deinake, ka avaha yai am-venena-kavovona avaniahei.

³ Yauke apa-vidovidohemi deina, kadu avaha avonei avi tuta avaniahami, itomi avaha yami am-venena-kavovona uvo-vi-aiai-yehai. Wayahina, ataina amataedami un'-anamanei, apaina vavaneika tupwai Titusi nui avi-tunei, ka eha yau nuanua taui yau vona-vanevane wayahimi ivaniahe vivane vitupu.

⁴ Iuna avaha avona-vanevane wayahimi. Ka apaina tupwai me Masedonia yauke nui an'-omo wayahimia, ka avi tuta an'-omo aituhu yami am-venena-kavovona eha uta-vo-vi-aiai-yehai, dewana pai ini-yauyau wayahiaia, ka kadu pai ini-yauyau ananina wayahimia.

⁵ Wayahina, yauke anuanua nau-wawanimi vavaneika tupwai amai-vi-tunei in'-omo wayahimia inau-vi-taumi, e ina-ivaitemi yami am-venena-kavovona ananina, nonova uvona-dabedabeyei, uvo-vi-aiai-yehai aitamoata deina. Na-iakwa, e avi tuta yauke me Masedonia vavaneikaia nui an'-omo wayahimia, akanai yami dewa ana dune ahiahina habuhabuka matakaia. Ka aituhu avaniahami, ka aituhu eha uta-vo-vi-aiai-yehai, auyewana wayahina yami dewa ana dune vivane aveimeyemi udewei, kate eha yami nuanua. Wayahina dewana ana dune yami kina unua-tania deina.

⁶ Vona tana-minikuna taina unuani. Am-venena-kavovo baguna deina.

Aituhu aviyaivia tuta ataina wayahina itavuni

kikituna,
apaina taui in'-aikayo kikituna.
Ka aituhu aviyaivia tuta ataina wayahina
itavuni ananina,
apaina taui in'-aikayo ananina.◊

7 Wayahina, aitamoata aitamoata wayahimia nau-wawanimi naona aviani ami pata un'-am-venena-kavovo uvi-nua-dadani. Eha aitam veimea ta-mamae na-veimeyemi un'-am-venena-kavovo. Aituhu eha yami nuanua, akanai, eha udewe. Iuna Yaubada taui yai dewa-haiawa nui in'-am-venena-kavovo dewa-vidovidiohei. **8** Ka Yaubada ana pata am-venena awawaehina ananina na-venemi. Ka tauna na-vo-vi-aiaimi deina. Wayahina, avi tuta nau-wawanimi, o kadi avi dewa nau-wawanimi, akanai itomi ami pata paisewa ahiahina aitamoata aitamoata udedewei deina. **9** Aitam vona Iginuma nihenina, ivona,

“Aituhu aviyaivia avaha yai am-venena-kavovo
tau payapayaya habuhabui
papani tunina tunina wayahia ivene-neiei,
tomotaui yai dewa tunutunuhina
na-ma'-vavaha.”◊

10 Ka Yaubada waipei tau baguna venevenei, ka kadu munia waipeia wayahia aniani vin'-omo wayahika. Ka kadu waipei tunina venevenem, vivane dewa ahiahina waipei, ka waipeia wayahia yami dewa tunuhina ivin'-omo, ka

◊ **9:6:** VT 11:24-25. ◊ **9:9:** Sam 112:9.

dewaia dewa tunutunuhina an' aikayo ananina.[◊]
11 Ika. Tauna yami kaikaiwabo tunina tunina venevenemi, iuna ya nuanua tuta tuta ami pata un'-am-venena-kavovo ananina. Ka tuta ataina wayahina avi am-venena-kavovo uveneai, dewana wayahina mani tomotau Yaubada ina-nau-kaiwei ananina.[◊] **12** Ka munia, yami am-venena-kavovona wayahina dewa ainua ivin'-omo. Naona mani tau ekalesia payapayaya una-ivaitei, ividoha. Ka v'-inuana mani tomotau avaha yami dewana vaneana inononi, e taui Yaubada ina-nau-kaiwei ananina. **13** Ka tuta ataina wayahina yami dewana wayahina tomotau habuhabui uviwavenei yami vitumahana Vaneana Ahiahina Tau Ito-yavuha wayahina eha vonata, kate vitumahana-hoina. Ka tuta tepakaia wayahina tau payapayayaia una-ivaitei taui Yaubada in'-apa-vidovidohhei. Ka eha taui ai heta, kate mani tomotau habuhabui una-ivaitei Yaubada in'-apa-vidovidohhei deina. **14** Ka kadu munia, avaha Yaubada yan' am-venena awawaehina wayahimia inuani, e ayaunena ahiahina wayahina iviama bagibagina wayahimi. **15** Vona ahiahina, nau-wawanika Yaubada kanau-kaiwei yan' am-venena-kavovo ani-vainena wayahikaia wayahina, vivane Iesu Tau Ito-yavuha. Itoka tomotau movikaia eha aka pata kasi-vin'-omane tunuhina wayahina.

10

Paulo Ya Paisewa Ipupu Tana-potepotei

[◊] **9:10:** Isa 55:10. [◊] **9:11:** 2Ko 1:11; 4:15.

¹ Tupwai tomotau wayahimia ivonavona deina, ivona, "Avi tuta Paulo nui kamamaei, tauna matamatauta kadu yana dewa ihanuana. Kate avaha ni-tawaneai, akanai yama leta nihenina tauna vona panina wayahina ginuginuma." Ka taui yai vonana vona vitupu. Kate vona ahiahina, ataina yau viama vin'-omo wayahimia nua-opu wayahina kadu dewa bigana wayahina. Dewai ainua Tau Ito-yavuha yana dewa.[◇] ² Ka vona bigana wayahina aviamemi, iuna yau nuanua tuta ataina wayahina unua-vinana. Ka aituhu aviyavia wayahimia eha ita-nua-vinana, apaina avi tuta anau-vi-taumi, nau-wawaniu dewa panina wayahina yawai avo-vi-tunuhi. Avonavona deina, iuna avaha anamanemi, tupwai wayahimia ivitumahana-wayoheu vivane yauke yau dewa vivane tau ma' tanopi yai dewa vitupu deina.[◇] ³ Vona ahiahina, itoai tanopia amamaei, kate avi tuta anau-havia, yama dewa eha tau ma' tanopi yai dewa deina. ⁴ Ka kadu yama bwetubwetu ka yama waipai eha tau ma' tanopi yai bwetubwetu o yai waipai deina. Eha. Yama pai nau-havia tunina. Iuna Yaubada avaha ya bagibagi vo-patai, e bagibagi-nana wayahina Satana ya pai veimea avita-vovoni.[◇] ⁵ Ama havia tunina. Aituhu avi viwavenena o avi vitupu nua-vane wayahina iomomo, e aituhu Yaubada ya viwavenena wayahina ivi-vonavona, nuanua-naia habuhabui avita-vovoni. Ka kadu avi nuanua vitupu Yaubada a vitumahana vito-potei, nuanua-naia asi-vo-tania, aveimeyei Tau Ito-yavuha ya nuanua ivi-muniei, tau

[◇] **10:1:** 1Ko 2:3. [◇] **10:2:** 1Ko 4:21. [◇] **10:4:** Epe 6:13-17.

nau-havia ai havia isi-vo-tania, iveimeyei deina.

⁶ Wayahina, tuta ataina wayahina itoai apotapota yawaimi uvo-vi-tunuhi, ka kadu yama vona yami leta nihenina uvi-ateteye-yehai. Na-iakwa, aituhu aviyaivia vonana ivihahaiei, akanai taui yai dewa goyona aitamoata aitamoata wayahina adewa-yaiyaiei. ⁷ Itomi udunedune, kate aviani ududueyei eha unuanua tunuhina wayahina. Aituhu koiaka wayahimia enuanua toyoina, “Vona tunuhina, yauke Tau Ito-yavuha ya tomotau aitam,” akanai, nau-wawanim eawaehai kadu itoai Tau Ito-yavuha ya tomotau.

⁸ Yaiau, yami leta nihenina yau vona tupwai a nonona avona-vanevane deina, kate eha. Yaubada avaha bagibagi kadu veimea veneai, iuna tauna ya nuanua dewanai wayahia aivaitemi, eha ya nuanua dewanai wayahia avi-goyomi. Ka aituhu yau vonaia yama bagibagi-nana kadu ama veimeana wayahi a nonona avona-vanevane deina, eha aitam aviani dewana nihenina wayahina an'-ini-yauyau.[◊]

⁹ Eha yau nuanua vona panina wayahina yami leta nihenina avo-vi-matautemi, ka kadu eha yau nuanua unuanua deina. ¹⁰ Ka tau viwavenena vitupu tupwai wayahimia ivonavona, “Bana manainai wayahina Paulo vona panina wayahina yapoyapoka yaka leta nihenia, kate avi tuta matakaia mimini, tauna ana dune ihanuana, kadu yana ipupu eha aitam aviani.” ¹¹ Taui ivonavona deina, kate tomotau-naia nau-wawani in'-anamanreu, aituhu aviani avaha aginumi wayahimia yami leta nihenia, apaina, avi tuta

[◊] **10:8:** 2Ko 13:10.

avaniahami, akanai, adedewe deiake, iuna yau vona ka yau dewa aitamoata.

*Paulo Vi-putu Tau Viwavenena Vitupu Etutuia
Veneuei*

¹² Taui matataui ibou-viwave-neiei. Iakwa, ivona-vanevane yai dewa wayahina. Kate taui idedewe deiina mwagewagei. Wayahina, dewana avihahaiei. ¹³ Yaubada yama papani paisewa wayahina vi-nua-dadani, kadu awaehei. Ka yami meagai yama papani paisewa wayahina nihenina mamaei. Wayahina, itoai ama pata paisewana wayahina avona-vanevane. Kate itoai mani tau paisewa yai papani nihenia eha ata-paipaisewa, kadu eha ata-vona-vanevane dewana wayahina. ¹⁴ Ka aituhu avona-vanevane, eha ata-vona-vanevane ani-vainena. Iuna nonova tomotaui aeta-naoi, ka avaha yami meagai avaniahei, ka kadu Tau Ito-yavuha Vaneana Ahiahina aomanei, amataedami, unononi. Aituhu eha aeta-naonao deiina, akanai, yama vona-vanevane-nana eha tunuhina. ¹⁵ Ka kadu eha mani tomotau yai paisewa ata-vona-vanevane wayahina, tau viwavenena vitupu yai dewa deiina. Yama nuanua ananina an'-omo wayahimia, anau-vi-taumi, ka avaha yami vitumahana nata, akanai itoai yama paisewa nihenimia ana pata nata aitamoata deiina. ¹⁶ Ka yama nuanua ananina vivane tuta tepakaia ani-tawanemi aubo-tamana papani bana mamanaina wayahina. Ka taui kadu papani enoma wayahia Vaneana Ahiahina anaunau-waheyei. Tau

[☆] **10:13:** Rom 12:3.

viwavenena tupwai ipotapota, e mani tomotau ieta-naoi, ka avaha mani tomotau etawana ivo-vi-meani, e munia tau viwavene-naia in'-omo ivona-vanevane paisewana wayahina. Kate itoai yama dewa eha deinake. ¹⁷ Aitam veimea mamaei, ka veimeana ahiahina habuhabuka wayahikaia, ivona

“Aituhu aviyaivia yai nuanua
paisewa ananina ivona-vanevaneyei,
taui nau-wawani
Kauvea ya paisewa ana heta
ivona-vanevaneyei.”[☆]

¹⁸ Iuna aituhu koiaka ana heta ya paisewa apa-vidovidoheti, dewana awakabina Yaubada matana. Kate aituhu Kauvea yaka paisewa apa-vidovidoheti, vonana mani vona vane-tawanei.[☆]

11

Paulo Me Korinita Etutuia Venauei

¹ Tuta eha ani-hoina wayahina yau vona taina omomo kwavakwavau avonavona deina. Wayahina, naona aviamemi utoha-vi-anaimi wayahiu tuta kutakutana wayahina. Anuanua ami pata utoha-vi-anaimi, iuna avaha udedewei deina. ² Ka yauke avi-bwanou wayahimi, Yaubada vi-bwanou wayahimi deina. Iuna nonova, tutana Vaneana Ahiahina anaunau-wahemi uvitumahanei, dewana wayahina avi-awa-kanakanapiemi Tau

[☆] **10:17:** Ier 9:24; 1Ko 1:31. [☆] **10:18:** 1Ko 4:4.

Ito-yavuha ana heta wayahina deina. Ka tuta ataina wayahina yami ekalesia ahabana ahiji-vainena deina tauna matana, ka kadu tauna yauke ama inua yama nuanua ahabana deina umamaei a itoava tavine an' auyewa wayahina.^{◊ 3} Kate tuta ataina wayahina amatamatauta, kadu yau inovo wayahimi. Tuta naona wayahina Satana omo Eve wayahina mwata deina, ka tauna sinasinapuna wayahina ana-dibidibiei. Ka Eve Satana ya vitupu vitumahana-wayohei. Ka nonova, tutana Vaneana Ahiahina uvitumahanei, uvi-putu Tau Ito-yavuha uvi-muni-waiwaie i dewa ahihinata wayahina. Ka eha yau nuanua aitam koiaka omo wayahimia, ka ya vitupu wayahina eta-naoemi Tau Ito-yavuha uni-tawanei.^{◊ 4} Nonova, tutana aomo wayahimia, Iesu anaunau-waheyemi ka uvitumahanei, ka kadu Nuana Ahihinata uvaniahei tuta-nana wayahina. Ka Vaneana Ahiahina anaunau-waheyemi uawaehi tunuhina. Kate munia, tau viwavenena tupwai iomo wayahimia, ka yai viwavenena Iesu wayahina tunina, ka kadu yai nuanua nua tunina uawaehi, kadu vane inaunau-waheyei vane tunina. Tau vitupu-naia idedewei deina, ka memeanina itomi uawaehi.^{◊ 5} Kaiwadi, unuanua tau viwavenena vovoui tau hae anani? Ka unuanua ivane-tawaneu, a? Ia! Ataina avonemi, taui eha ivane-tawaneu. Eha-ohota!^{◊ 6} Kaiwadi, avi tuta tomotau yau vona inononi, eha a nonona avaivana, iuna eha aitam koiaka

^{◊ 3} **11:2:** Epe 5:26-27. ^{◊ 11:3: Nao 3:4, 13. ^{◊ 11:4: Gal 1:8-9.}}

^{◊ 6} **11:5:** 1Ko 15:10; 2Ko 12:11.

ta-viwaveneu avaivana ahiahina. Kate vona ahiahina, nua-uya tunutunuhina wayahiu mamaei, ka kadu dewa habuhabuna wayahina avaha aviwanememi uanamane-yehaiu deina. [☆]

⁷ Kaiwadi, medeina unuanua? Nonova, tutana aomo wayahimia Yaubada Vaneana wayahimia anau-waheyei. Ka vona ahiahina, yauke taua au wava abou-opuei, kadu itomi ami wava abou-vaneyei. Ika, yau dewa deina, iuna tutana anaunau-wahemi, eha aitam patana ata-tomani yau paisewa wayahina. Eha. Kate yau nau-wahe awawaehina avenevenememi. [☆] ⁸ Kaiwadi, tupwai tomotau mataia dewana ana dune avi-tau vainau aitam deina. Iuna tutana wayahimia amamaei, mani ekalesia wayahia kina avaniahei, e taumi aivaitemi. [☆] ⁹ Ka kadu tutana yami papani nihen-inna amamaei, aituhu am anavovo, eha ata-viama wayahimia. Unononi, vavaneika tupwai papani Masedonia wayahina iomo, ka taui ivaita iveneu. Tuta nonova wayahina eha aitam vita wayahimia ata-boubou, ka kadu tuta tepakaia wayahina eha aboubou. ¹⁰ Yau dewana ana heta vivane yau pai vona-vanevane. Ka vona ahiahina, Tau Ito-yavuha yana vona tunutunuhina wayahiu mamaei, ka kadu yau vona taina wayahimia tunutunuhina deina. Ka tuta tepakaia wayahina eha yau dewa wayahimia avo-vine. Iuna eha yau nuanua aitam koiaka itomi wayahimia yami papani Akaia nihenina ana pata yau vona-vanevane taina na-vito-pote. ¹¹ Ka aviani iuna adedewe deina? Kaiwadi, unuanua aviha-haiem? Eha-ohota! Yaubada avaha anamaneu

[☆] **11:6:** 1Ko 2:1, 13. [☆] **11:7:** 1Ko 9:18. [☆] **11:8:** Pili 4:15-16; 2Ko 12:13.

adewa-vidovidohemi. ¹² Ka kadu tuta tepakaia wayahina yau paisewa wayahimia adedewe iaitamoata deina. Eha aitam kina wayahimia an'-epe au nau-pata wayahina. Udu. Avi tuta tau viwavenena vitupu inaunau-wahemi, taui yami kina iepepei ai nau-pata wayahina, kadu ivona-vanevane taui yai dewa yauke yau dewa aitamoata. Ka yau nuanua yau dewa wayahina aviwavenemi taui yai dewa eha yauke yau dewa deina. Ka aituhu uanamaneu ahiahina, tuta tepakaia wayahina taui eha ai pata ivona-vanevane-havine deina. ¹³ Vona tunuhina, ononotoi tau hae vitupu ka tau paisewa goyona. Ka taui yai nuanua inonomi uvitumahanei taui Tau Ito-yavuha a tau hae anani. ¹⁴ Ka yai dewa goyo-nana eha aitam pai nau tupatupa. Iuna Satana ya nuanua ya vitupu a nonona vivane tauna aitam anelose mahemaheina. Ka tauna ya vitupu hivehivei deina. ¹⁵ Ka kadu Satana ya tau paisewa yai nuanua yai dewa goyona ana dune dewa tunutunuhina ana dune deina. Iuna yai nuanua yai dewa goyona ihivehivei deinake. Vona ahiahina, tuta pai nau-yehtata wayahina, taui yai dewa goyona wayahi dewa-yaiyai-vavaha Yaubada wayahina ivaniahei. Akanai deina.

¹⁶ Avona-havinemi, eha nau-wawanimi uapa-kwavakwava. Ka aituhu uvitumahaneu yauke kwavakwava, akanai, eha aitam aviani wayahiua. Iuna avi tuta tau kwavakwava in'-omo wayahimia, e ivona-vanevane yai dewa wayahina, vonaia unononi. Wayahina, nau-wawanimi yau vona-vanevane unononi deina, a? ¹⁷ Avaha anamaneu vona taina wayahiua

vona tunutunuhina ana noe. Kate vona ahiahina, yau vona-vanevane taina eha Kauvea yana dewa deina, kate yau dewa taina tau kwavakwavana yana dewa deina. ¹⁸ Ka tomotau habuhabui avaha ivona-vanevane, tau ma' tanopi yai dewa deina, ka avaha yai vonaia unononi. Wayahina, ataina yauke kadu avona-vanevane taui deina. ¹⁹ Tau kwavakwawai yai vona unononi, uawaeheli, uvi-munie. Wayahina, avaha yami nua-uya kadueyei, a? ²⁰ Ika. Avaha kanamanei yami toha-vi-anai ani-vainena. Aituhu aviyaivia in'-omo inau-vuhatami uvi-tau paisewa-kavokavovo wayahi, akanai wayahia un'-awaehemi. O aituhu aviyaivia inonomi, e yami gugua ivainaui, wayahi utoha-vi-anaimi. O aituhu aviyaivia iva-taunemi, e ai wava ibou-vaneyei, o aituhu aviyaivia tepami ipiahi, akanai yai dewa un'-awaeheli. ²¹ Ia! Yauke eha ata-vi-goyomi deina. Wayahina, au dune ihanuau, a? Kaiwadi matamia yau dewa bigana wayahimia yau pai ini-yauyau, a? Avaha anamanei yau dewa dewa kwavakwavana deina, ka aituhu mani tomotau yai dewa wayahi ivona-vanevane, akanai kadu yauke deina.◊

Paulo Ya Hidahida Voneyei

²² Aituhu ivona-vanevane iuna taui me Ebereu, vona ahiahina yauke kadu me Ebereu aitam deina. Aituhu ivona-vanevane iuna taui me Isiraeli, yauke kadu me Isiraeli aitam deina. Aituhu taui Abaraham ya tupua-nenenehi, yauke kadu Abaraham ya tupua-nenenehi aitam

◊ **11:21:** Pili 3:5.

deina. ²³ Kaiwadi, ivona-vanevane iuna taui Tau Ito-yavuha ya tau paisewa, a? (Ia! Yau vona taina vivane vona kwavakwavana.) Avonemi, yau paisewa Tau Ito-yavuha wayahina taui yai paisewa vane-tawane-neiei. Unononi. Yau paisewa vita-vainena. Kate ai vi-am tuta tomotau iyohoni manua yohona nihenina imamaei? Vona ahiahina, tuta habuhabuna wayahina iyohoniu manua yohona nihenia amamaei. Ka kadu tuta habuhabuna wayahina yavunai manimaninina wayahina ivunuvunu. Kadu tuta tuta yau aniga omomo adidueyei.²⁴ ²⁴ Tuta ai yau 5 nihenia me Iudea yavunai wayahina imoamoaniu, ka tuta aitamoata aitamoata nihenina ai yau 39 ivunuvunu.²⁵ ²⁵ Ka kadu tuta aitonu nihenia ai wayahia ivunuvunu, ka aitam tuta hanu wayahia itutu-hanuhanu, ka tuta aitonu wae nihenina agavivina ana, ka auyewa aitam kadu ioyoma aitam anunueu.²⁶ ²⁶ Ka kadu tuta tuta ani-keyekeyeu, eha ata-vi-yawai. Wayahina, eha ani-hoina aniga o kadi inahe avaniahe daudau anani nihenia, kadu tau vainau wayahia, kadu yau yoko taui me Iudea wayahia, kadu taui eha me Iudea wayahia, kadu meagai anani nihenia, kadu udana nihenia, kadu hawana nihenia, ka kadu vavaneika tau vitupu yai viam-nonona wayahia.²⁷ ²⁷ Yau paisewa ananina apaipaisewi ma' vita ai tuta wayahina, ka tuta habuhabuna wayahina ioyoma eha ata-daudauva. Ka kadu am navovo kadu maga ayaya avaniahei, ka tuta habuhabuna eha au ma', ka tuta kwadudu

²³ **11:23:** Dew 16:23. ²⁴ **11:24:** VV 25:3. ²⁵ **11:25:** Dew 16:22; 14:19. ²⁶ **11:26:** Dew 9:23; 14:5.

wayahia eha yau manua kadu eha au kwama.
 28 Ka kadu vitai habuhabui hetaia, auyewa aitamoata aitamoata anuanua ananina itomi tau ekalesia wayahimi, kadu tau ekalesia papani tunina tunina wayahi. 29 Ka aituhu aitam wayahimia ihanua, yauke kadu ayaunei aihanua deina. Ka aituhu tau goyona na-omo ka aituhu tauna aitam wayahimia eta-naoei dewa goyona deweい, yauke kadu niheniuua amaga-bawe dewana wayahina.

30 Wayahina, unononi. Yau vona-vanevane yau ihanua iviwavenemi udueyei. 31 Yaubada, tauna Kauvea Iesu Amana, ka nau-wawanika kan'-awa-dava-vavaha, ka tauna anamaneu yau vonana habuhabuna eha vitupu. 32 Nonova, tutana yauke meagai Damasikusi amamaei, me Damasikusi yai kini V ana wava Aretasi. Ka Are-tasi ya tau paisewa aitam meagai-nana veimeyei kadu dune-vi-avini. Ka tau veimeana ya nuanua na-poy'-aviniu, na-vunuvunu. Wayahina, tauna ya tomotau veimeyei meagaina a tutu-gana manaina an' awa idune-vi-anai, ipoy'-aviniu. 33 Kate yaiau meagai-nana nihenina ivo-taitaieu, e venuana ananina nihenina iauwaniu. E meagai-nana ana gani hetana wayahina akwaioyo aopu tanopia, e au havia-naia anovo-tawanei deina.

12

Paulo Ipupu Si-vin'-omana Wayahia

1 Yau vona-vanevane eha anau-yehai. Vona ahiahina, eha aitam aviani ahiahina ana pata

◊ 11:32: Dew 9:23-25.

na-omo dewa taina wayahina, kate yau nuanua dune kadu si-vin'-omana avaniahei Kauvea wayahina atomani unononi. ² Ponimana ai yau 14 iakwa aitam onoto, tauna Tau Ito-yavuha nihenina, anamanei, ka Yaubada onoto-nana taini vaneyei wahuma v'-itonuna wayahina. Kaiwadi ininina ivane, o kadi nuana ana heta ivane, eha at'-anamane, Yaubada ana heta anamanei. ³⁻⁴ Ka anamanei, Yaubada onotona taini vaneyei papani ahihi-vainena wahuma. Kaiwadi, onoto-nana ininina ivane, o kadi nuana ana heta ivane, yauke eha at'-anamane, Yaubada anamanei. Ka tenoke onoto-nana nua-uya nononi, ka Yaubada eha tl'-awaeha tauna nua-uyana wayahina na-ipupu. ⁵ Ika, onoto-nana wayahina avona-vanevane, kate wayahiu eha yau nuanua avona-vanevane. Nau-wawaniu yau ihanua ai heta wayahi avona-vanevane. ⁶ Ka aituhu tuta tepakaia wayahina avi-nua-dadani wayahiu avona-vanevane, dewana eha vona kwavakwavana. Iuna yau vonaia tunutunuhina ana noe, eha tau kwavakwawai yai vitupu deina. Kate avaha avi-nua-dadani vona-vanevane deina avihahaiei. Iuna nuanuau naona yau dewa ududueyei kadu yau vona unononi. Ka yau nuanua avaha ainua ubou-viwavei ami pata yauke taua un'-anamaneu tunuhiu.

Paulo A Havia Ininina Nihenina

⁷ Ka eha Yaubada ya nuanua yauke anua-vane si-vin'-omana-naia ahihi-vainei wayahi. Wayahina, tauna aitam tau mataeda Satana wayahina vi-tunei omo wayahiua, ka niheniuia

viha anau-dadani apia deina. Ka vihana wayahina anua-vita, ka eha au pata anua-vane.[◊]

⁸ Ka tuta aitonu wayahina vita-nana wayahina Kauvea aviamei n'-epa-yavune. ⁹ Kate yau viamana nau-patei, ivona, “Eha. Am-venena awawaehina ana heta avenem am pata. Iuna avi tuta yam ihanua enau-dadani, yau bagibagi ihanuaia bagibagi-tawanei.” Wayahina, yau dewa-haiawa wayahina avona-vanevane yau ihanua wayahi, e Tau Ito-yavuha ya bagibagi wayahiua mamaei, ayaunei deina.[◊] ¹⁰ Ka Tau Ito-yavuha wayahina yauke awaeheu vitaia habuhabui wayahia, vivane ihanua, ka apa-goyogoyo, ka vita tunina tunina, ka nau-havia, ka kadu inahe. Dewaia habuhabui wayahia awaeheu, iuna avi tuta aihanua, tauna ya bagibagi wayahina avi-tau bagibagi.

¹¹ Akanai. Vona ahiahina, avaha aipuipupu tau kwavakwavana aitam deina. Ika, adedeweи deina, ka iuna yau ipupu taina wayahina vivane itomi yami dewa. Tutana tau hae vitupu iomo wayahimia, itomi nau-wawanimi un'-apa-vidoviduheu, kate eha uta-dewe. Yai vona-opuopu wayahiu unononi, ka kadu uvitumahanei. Ka aituhu taui yai dewa ka yauke yau dewa ainua kabou-viwavei, eha avi-kutakuta. Yauke eha aitam aviani, kate ataina avona-havinemi, taui eha ivane-tawaneu.[◊] ¹² Ai vi-am iaiaya nau-wawanimi, e munia un'-anamanueu yauke taua tau hae-hoiu? Tutana nui

[◊] **12:7:** Iob 2:6. [◊] **12:9:** Pili 4:11-13. [◊] **12:11:** 2Ko 11:5.

kamamaei, pai dune habuhabui ududueyei, vivane iaiaya, ka dewa pai nua-tupatupai, ka kadu dewa-bagibagi-vainei. Ka matamia adewa-havihavinei.[◊]

*Kadu Aitam Tuta Wayahina Paulo Me Korinita
Etutuia Venauei*

¹³ Kaiwadi, nonova a itoava tuta ataina wayahina yami ekalesia avi-goyoi? Eha. Dewa aitamoata ana heta wayahina yau dewa tunina yami ekalesia wayahina, vivane eha aitam tuta wayahina yami kina ata-viame una-ivaiteu. Kaiwadi, dewana ududueyei, unuanua avi-goyomi, a? Aituhu deina, ami pata yau dewa goyo-nana wayahina unua-piahui?[◊]

¹⁴ Tuta kutakutana na-iakwa an'-omo wayahimia anau-vi-taumi tuta v'-itonuna wayahina. Ka eha yau nuanua avitami kina wayahina. Iuna yau nuanua eha yami gugua, kate yau nuanua vivane taumi. Aitam vona tana-minikuna ivona,

“Natunatuka eha nau-wawani kina igwaug-waui,
itoka ayo-amai ina-ivaiteka,
kate itoka nau-wawanika kagwaugwaui,
natunatuka kana-ivaitei”.

Ka yauke anuanua itomi natunatu Tau Ito-yavuha nihenina deina. Wayahina, eha yau nuanua yami gugua uveneveneu una-ivaiteu. ¹⁵ Wayahina, yau dewa-haiawa wayahina yau kina habuhabuna awaehei aivaitemi, ka

[◊] **12:12:** Rom 15:19. [◊] **12:13:** 2Ko 11:9.

kadu yauke taua yawaiu awaehei wayahimi. Yaiau, aituhu yau dewa-vidovidoha wayahimi natanata, kaiwadi, yami dewa-vidovidoha wayahiu opuopu? ¹⁶ Akanai. Itomi eha ami pata wayahiu uvonavona, “Paulo yama gugua epepei, e vitavitai deina”. Tau vitupu tupwai ivonavona wayahiu yauke tau nono aitam. O, ika. Yauke sinasinapu, ka yau nua-uya wayahina avi-onami. Yami kina eha ata-epe, wayahina anonomi, a? ¹⁷ Eha! Unuani. Avi ononotoi avi-tunei iomo wayahimia yami kina iepepei iveneveneu? Eha aitam! ¹⁸ Nonova Titusi aviamei na-nau-vi-taumi, kadu vaneika aitam nui ainua avi-tunei iomo wayahimia. Ka medeina? Aitam wayahia yami gugua iepei? Eha. Kaiwadi, yauke Titusi ama inua yama dewa wayahimia aitamoata, kadu yama nuanua aitamoata, a? Ika, aitamoata.◊

¹⁹ Yaiau, yami leta taina nihenina a pai vi-putu wayahina a itoava tuta ataina wayahina medeina unuanua? Kaiwadi, unuanua yama vonana wayahia ama heta yama dewa aipuipupu-tana-potai matamia? Eha-ohota! Yama vona aitamoata aitamoata avonevонеми Yaubada maјana vivane Tau Ito-yavuha ya nuanua deina. Ka vona ahiahina, yama nuanua dewa aitamoata aitamoata adedewei avo-vi-bagibagimi. ²⁰ Ataina amatamatauta, iuna anuanua avi tuta avaniahami, yami dewa avaniahei eha tunuhina, kate bwagona. Wayahina, munia nau-wawaniu manimaniniu yawaimi

◊ **12:18:** 2Ko 8:6, 16-18.

asi-vi-tunuhi. Anuanua ananina ate-viviha wayahina avi tuta avaniahami uvito-dahadaha, ka uvi-bwanou, ka vo-kwayavonina unua-goyo, ka utana-vewavewani gwau gwau, ka yaiami uapa-goyogoyoei, ka umabonu, ka unua-vanevane, ka kadu udewa-kavokavovo.

21 Yau ate-vivihana wayahina anuanua ananina avi tuta avaniahe-havinemi, yau Yaubada ini-yauyau veneu matamia, e atoutou. Iuna nonova tupwai wayahimia idewa-goyogoyo, kate auyewana wayahina a itoava tuta ataina wayahina, eha ita-nua-vinana yai dewa gawagawami wayahi, o yai kenene wayahi, o yai dewa-kavokavovo wayahi. Nonova idedewe dei, kate tuta ataina, kaiwadi?◊

13

Nau-vi-avina Pai Nau-yehata

1 Apaina anau-vi-taumi tuta v^l-itonuna wayahina, ka Iginuma nihenina ivoneka,

“Aituhu aitam tomotau a niam apa-goyogoyoei,
yana vona ana heta eha ana pata
unau-hohona vitana matana wayahina.

Tauna tau dune aitamoata.

Kate aituhu tomotau ainua o kadi aitonu
yai vona iawaehi aitamoata,
ka aituhu ai niam iapa-goyogoyoei,
aina ana pata unau-hohona vitana matana
wayahina.

Iuna tau dune ainua o aitonu.”◊

◊ **12:21:** 2Ko 13:2. ◊ **13:1:** VV 19:15; Mat 18:16; 1Ti 5:19.

2 Nonova tuta v^l-inuana wayahina nui kamamaei vona panina wayahina avonemi, nau-wawanimi yami dewa goyona wayahi unua-vinana. Aina tau dune aitamoata deina. Ka tuta ataina wayahina eha nui kata-mamae, kate avona-havinemi. Itomi nau-wawanimi yami dewa goyona wayahi unua-vinana. Yau vonana tau dune v^l-inuana deina. Aituhu eha uta-nua-vinana, avi tuta avaniahami, tau goyo-naia nonova idewa-goyogoyo kadu taui munia ivi-putu idewa-goyogoyo, taui habuhabui ai dewa-yaiyai avenei ivaniahei. Ka eha bigana.

3 Kaiwadi, yami nuanua iaiaya udueyei, e un^l-anamanei vivane Tau Ito-yavuha yana vona aipuipupuei, a? Akanai, apaina iaiaya udueyei. Iuna tauna yana dewa wayahimia eha ihanuana, kate bagibagina. **4** Vona ahiahina, tutana tomotau itutu-pwatei, dewana ana dune vivane tauna ihanuana. Kate tuta ataina wayahina tauna na yawaina ma^l-vavaha, iuna Yaubada ya bagibagi. Ka tuta ataina wayahina itoai kadu ama dune tauna nihenina vivane ihanuai. Kate itoai kadu tauna nui amamaei, ka avi-tau paisewa wayahimi, iuna Yaubada ya bagibagi.[◊]

5 Kaiwadi, itomi uvitumahana ahiahina? Udune-vivinimi, kadu unau-dadanimi, udueyei. Kaiwadi, itomi uanamanei Tau Ito-yavuha Iesu nihenimia mamaei o eha? Aituhu eha, nau-dadana taina avaha vi-peumi, ka yami vitumahana vitumahana vitupu.[◊]

6 Ataina anuanua apaina uvaniahei vivane nau-dadanana eha ta-vi-peuai. Iuna itoai yama

[◊] **13:4:** Pili 2:7-8. [◊] **13:5:** 1Ko 11:28.

vitumahana vivane vitumahana tunuhina kadu toyoina.

⁷ Ataina itoai aviamma Yaubada wayahina tauna na-ivaitemi eha aitam aviani wayahina udewa-goyogoyo. Ka yama viamana eha ta-vin'-omo iuna yama nuanua tomotau ididueyeai yama vitumahana mimini-toyoa. Eha. Yama viamana vin'-omo iuna yama nuanua itomi yami dewa ahiahina ana noe. Aituhu itoai ama dune nau-dadanana vi-peuai, o kadi aituhu ama dune nau-dadanana ama pata, ainua eha aitam aviani wayahiaia. ⁸ Avonavona deina iuna itoai eha ama pata vona tunutunuhina avi-goyoi, a havia ivi-goyogoyoi deina. Eha. Itoai vona tunutunuhina a niam, kadu tuta tuta aivaitei. ⁹ Wayahina, avi tuta itoai ama dune ihanuai, kate itomi ami dune bagibagimi, adewa-haiawa. Ka kadu aviamma dewa goyona habuhabui yami ekalesia nihenina ubou-ohoi, uvo-vi-tunuha. ¹⁰ Ataina eha nui kata-mamae, kate yauke vonana panina aginuginumi na-omo wayahimia. Iuna yau nuanua yami ekalesia uvo-vi-tunuha. Ka aituhu unua-vinana, ka aituhu yawaimi ividoha, akanai, avi tuta an'-omo wayahimia kadueyemi, eha nau-wawaniu dewa manimaninina wayahina aveimeyemi. Iuna Kauvea bagibagi kadu veimea veneu adewa-vidovidohemi, eha avita-vovonimi.◊

Pai Nau-yehata

¹¹ Ka pai nau-yehata, vavaneiai, kapoi. Udewa-dadana yami dewa aitamoata aitamoata Tau Ito-yavuha yana dewa deina, vivane

◊ 13:10: 2Ko 10:8.

2 Korinita 13:12

liv

2 Korinita 13:13

ahihinata. Yau viama wayahimia yami leta taina nihenina unononi. Nau-wawanimi uawaehi aitamoata, kadu nua gomagomanina nui umamaei. Aituhu deina, Yaubada nui umamaei. Dune-nuanuai kadu nua gomagomanina ainua ivin'-omo Yaubada wayahina.

¹² Nau-wawanimi aitamoata aitamoata wayahimia unau-kaiwemi mao ahihinata wayahina.

Yaubada a tau vitumahana habuhabui baina inau-kaiwemi.

¹³ Ka yau viama wayahimi nau-iaiava taina uvaniahei imamaei habuhabumi wayahimia, vivane am-venena awawaehina Kauvea Iesu Tau Ito-yavuha wayahina, kadu dewa-vidovidoha Yaubada wayahina, ka kadu pai vi-yaiana ahiahina Nuana Ahihinata wayahina.

Ana pata deina.

Yauke Paulo

**Awaeha Vovouna Minaveha Movic
The New Testament in the Minaveha Language of
Papua New Guinea
Nupela Testamen long tokples Minaveha long Niugini**

copyright © 2008 Wycliffe Bible Translators, Inc.

Language: Minaveha

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-04-23

PDF generated using Haiola and XeLaTeX on 21 Feb 2024 from source files dated 31 Aug 2023

b67aeeef-7e9d-566a-9ff5-cb22ab7e2ea4